



Ертіс

Сәуір 2000 №7-8

дидаары

1999- жылғы желтоқсанның 30-нан бастап шығатын Павлодар облыстық газеті

Тілейміз ағамызға ұзақ ғұмыр

Ертіс өңірінің және алаштың зиялы азаматтары
турасында бірнеше кітабы жарық көрген
Асқарұлы Ханафия ағамызға

Армысыз, Хана аға, ардақтаған,
Жансыз ғой бұл күндері ел мақтаған.
Сексеннің асқарына шықсаң дағы,
Бойына күш-қуатын мол сақтаған.

Аңсаған арманыңа аға жеттің,
Өрендерін еліңнің жыр ғып шерттің.
Бірер жылда төрт кітап төмам етіп,
Оқырманға мол қазына тарту еттің.

Дауылпаз Құдайберген, Иса дүлдүл,
Перзенттері Ертістің бұл қос бұлбұл.
Шежіресін солардың хаттап жинап,
Кейінгіге жеткіздің өте асыл пұл.

Зиялысын алаштың тағы жазып,
Теріпсіз асылдарын жазбай танып.
Саңлақ ақын Арқада Олжабай да
Кітабыңнан өзіндік орын алып.

Жазыпсыз тамсандырып ұлы Абайды,
Жүрміз ғой арман етіп Абылайды.
Тыныштық,, ауызбірлік, әділетті,
Баса айтқанды бүгінде жұрт қалайды.

Тілім, ділім дегенде, Сіз-данасыз,
Айшықтап сөз маржанын қолданасыз.
Желтоқсан күдіретін күнге балап,
Алашым, Астанам деп толғанасыз.

Азаматсыз, Ханеке, көпті көрген,
Өнеріңе Мұза ағаң баға берген.
Біз дағы қосыламыз бұл құрметке
Ағайын, жолдас- жора қасыңа ерген.



Айтып ең анада бір шабытың кеп,
Бабалар шежіресін жазамын деп.
Тарихын туған жердің қасиетті,
Білмейтін бүгін елде азамат көп.

Хана аға, басылмасын серпініңіз,
Армансыз ғой артында қалдырған із.
Мақсаттарға көздеген жете бергін,
Ұзақ ғұмыр тілейміз, жасаңыз жүз.

Мұрат Әбдірахманов